

## Vutant'ann (Ottant'anni)

Data : 7 settembre 2014



### Vutant'ann (Ottant'anni)

La storia ca va cunti la par fin minga vera  
Pense' ca la cumincia ammo prima du la guera  
In d'ul bel sit, pena fora vares  
Na gesa, quater ca..... Quasi n'paes

Al nas in d'una curt cunt n'usteria  
Piena da gent dul sit, e anca da via

Cunt un bel nom ca prumet abundanza  
In pasa' vutant'an e sa ciama ammo Speranza

Adess certament avrii induinaa  
Sem dre parla' dul Mene da Bubiaa

L'e' ammo un balila quan sciopa la guera  
Ghe minga de mangiaa ne a mesdi' ne a la sera  
Insci' quan cal ven grant e'l diventa un malnatt  
Cunt i so amiss al mangia tut i gat

Sunava un violin, ma minga par pasiun  
Se no ul Batistino la ciapava a sgiafun  
E quan ca finalment la pianta' li' da suna'  
Ghe stai tanti urecc can tira' ul fiaa

Podi minga tira' innanzi senza fa menziun  
Dun quai amiss cal ga dai l'ispiraziun  
Ul Ginu merican, il Siru pescadur  
Ul Ceta, ul Negrett, in gir a tut i ur  
Ma lu a diferenza de tut i'alter malnatt  
I so gent l'han cunvinciu' a studia' de raggiunatt  
E a chi temp la' ves raggiunier, l'eva un titul nubiliar  
Quasi cume un dutur, istess ca ves nudar  
Infati ancamo incoo al so pasagg  
Tucc ghe disen vulertera "buondi' rag"

Parti' sulda', e fu n'bel tenentin  
Ca'l sa credeva da vess fin un alpin  
Ma quella pena ca ga fu par cumpagna  
L'eva da a artiglier, se pur da muntagna

Quan ca l'ha fini' e l'han cungeda'  
Driz in banca l'e' n'dai a lauraa  
Ma subit se curgiuu ca cunta' i danee  
Quan ch'inn di alter l'e' minga n'gran mistee

Nem innanzi cunt la storia c'adess ariva un bel  
Quan ca par too miee l'e' ndai fina a Cantell

Par un quai mes l'e' gira' in gir un pu' titubant  
Cercava da capi', el sutava a fa dumand  
Ma tira e po bistira, taia e po medega  
Al se' trua' seta' in su na cadrega

E mi a questa storia tachi nanca n'butun  
Duperi i so parol "sunt burla' denter me n'sciatun

Inscii senza fiada'. E forzi senza capi'  
Al se trua' in gesa dentar a n'bel visti'  
A spusass la so Marisa dananzi dul Signur  
E fa parti na storia piena da tantu amur

E subit han taca' senza pensag a sura  
A met al mund i fioo, propi da gran cariera  
Ma un pu par furia, un pu par presa, un pu par impazienza  
Han sbaglia' i cunt, e fai ul prim han fini' l'inteligenza

Ga saria ammo tanti rop da cunta' su  
Ma nem innanzi sa da no finisumm pu'  
La fai mangim. E po anca ul ciculat  
Ma a lauraa pa'ialter al diventava matt

Finchee un bel dì l'ha incuntraa un dutur in su la so via  
Mia vun du l'uspedal' un dutur d'ecunomia  
Senza esitaziun e senza bat ul bec  
Han fai na dita e l'an ciamada Elmec

Par lauraa e par fa ul propi duer  
Fasevan i fatur pa chi ca fa ul buter

E dopu ul fer', ul ciculat e tanti alter client  
Che dopu qurant'an in chi ancamo cuntent

Forzi incoo l'è un pù stremii a vide stu carusell  
Che'm pica in pe' a Gazava e dopu anca Brunell  
Però ancamo incoo ca i vutanta inn bel e che sunaa  
Ghe minga n'di ' cal ven mia a lauraa  
In ogni sit el pasa, l' dumanda, l'suvrintend,  
Par ugnun un cunsili, na bona parola, n'incuragiament

U scrivu' tantu, ma l'è mia asè a fag unur  
Quel ça la fai, la sa dumà ul Signur  
Par di' tuscoss ga vor ben altar ca na puesia  
Ga vuraress un liber, anzi n'enciclopedia

Incoo sem chi tut i fioo e i neut, ca sem nanca quanti semm  
Cunt i'amiss da ogni cantun, e tucc ghe vorum ben  
Sa stringium cunt'afett e cunt' un bicer da vin  
Per fag cunt'alegria mila auguri e vutanta volt cin cin